

# SUHANO PAULUS SO FILEMON

## Kaatono Wamba

Paulus nopakatu suha aini ne seemie sabhangkano konea'ano Filemon. Filemon ini seemie marasaeano we kotano Kolose. Anoa ini seemie hangkaea, bhe bhatuano neano Onesimus. Onesimus nofilei mai'ao we lambuno Filemon, kafeompu'ano, maka nokala we kotano Roma. Wakutuu ana'a Paulus notitohongku we Roma. Onesimus ini nopo'awa bhe Paulus weo katohongku, ampamo kaowu miina natipande'aoa peda amai kadhadhiano. Hampano nopo'awa bhe Paulus, Onesimus nembali dua mie marasaeano ne Kristus.

Nopalusi ana'a, Paulus notudu Onesimus nasumuli we kafeompu'ano. Tamaka Onesimus note'i nasumuli bhahasaa nae'awa kahukumu, hampano padamo nofilei. Dadi'anomo Paulus nebuhi suha ne sabhangkano na'a. Weo suhano so Filemon ini Paulus nesalo kamaluno lalono Filemon, natumahima toha Onesimus we lambuno, suano kaowu mba'inomo bhatua amaitu nesalo ma'afumo, tamaka mangke-mangkemo mba'inomo Onesimus noparasaeamo dua ne Kristus, dadi'anomo dopobhahitiemo weo Ompu.

Weo wamba Yunani, ma'anano nea Onesimus “nokofahalaa”. Ambano Paulus, endefi'ini Onesimus ini miina nakofahalaa so kafeompu'ano, tamaka ampa aitu nokofahalaamo sepali'a, hampano noparasaeamo ne Kristus (aeti 11).

---

## Kalengkano suha

1-3

<sup>1</sup>Filemon, bhahitie timoasi'aono bhe sabhangka mani weo kahadhaano Ompu! Suha aini nomai'ao ne idi, Paulus bhe bhahitientoomu Timotius. Idi ini seemie katohongku hampano kaparasaea ne Kristus Yesus. <sup>2</sup>Suha mani ini so dua Apfia bhahitientoomu hobhine, bhe Arkipus posabhangka'antoomu dopotundu'ao Bhihita Metaa, bhe kosasawindo umati humompuno we lambumu itu. <sup>3</sup>Sio-siomo kabarakati bhe katohopono dadi mai'ao ne Lahata'ala Amantoomu bhe Ompu Yesus Kristus sadhia napobhaiangkoomu.

### Katumpuno lalono Paulus ne Filemon

4-7

<sup>4</sup>Taenomo asambahea sadhia asambiliko bhe notumpu laloku ne Lahata'ala, <sup>5</sup>kapa'amo afetingkeemo kanini kaasimu ne umati mongkilono bhe kaparasaeamu ne Ompu Yesus. <sup>6</sup>Asambahea sio-siomo dadi pobhahitie weo kaparasaeantoomu nakohasili metaa, ma'anano nasedhulu'a dua dalumosangie sabhaha kabarakati ne-tahimantoomu hampano dose'isemo bhe Kristus. <sup>7</sup>Filemon, bhahitieu, kaasimu ne umati marasaeano itu nofeka'ia bhe nofekatangka mpuu totono laloku, bhahamoa fodadiemo dua lalondo kosasawindo umatino Lahata'ala.

### Kamesalono Paulus so Onesimus

8-22

<sup>8</sup>Dadi'anomo, peda seemie bhahitiemu weo Kristus, o idi sakotu'uno akohaku amahintangiko mehabu maraluu'ano so nehabu. <sup>9</sup>Tamaka hampano kanini kaasi, koemo amahintangiko, naetaamo aesaloiko. Idi ini Paulus, akamungkulamo ka'asi, pakade atitohongku mba'inomo kaparasaeaku ne Kristus. <sup>10</sup>Aitu aesalo mpuu ne hintu so anaku Onesimus. Anoa ini akonaemo dua anaku hampano apoolie afoparasaea'e ne Kristus tangasano aeate weo katohongku ini. <sup>11</sup>Daanumo endefi'ini anoa ini miina nakofahala-laa'a so hintu, tamaka ampa aitu nokofahalaamo sepali'a naetaa so idi, naetaa so hintu.<sup>a</sup>

<sup>12</sup>Aitu ana'i kamoasi'aoku sepali'a ini, atuduemo nasumuli we hintu. <sup>13</sup>Sakotu'uno gaoku a'umele'aane we ini so umondofa kanau, kanggetumo dua wutomu, tangasano aeate weo katohongku ini hampano Bihita Metaa. <sup>14</sup>Ampamo kaowu akiido akonihabu ane pae'o dapo'uumbeti bhe hintu. Patudhuku, habu metaamu na'a koemo mba'inomo dofosuhuko, tamaka namai'ao weo kahelasino totono lalomu. <sup>15</sup>Bheanea patudhunomo Lahata'ala nopogaatia-ngkoomu sebantaha kaowu, neanomo sumuli tumahimae ampa suhue dhamani. <sup>16</sup>Aitu anoa suanomo seemie bhatua, tamaka nolaloi'emo, ingka nembalimo seemie bhahitiemu timoasi'aono. Sanginomo o idi aoasianemo, bhemo toha hintu. Tantumo moasia-ne, naetaa mba'inomo mie bhaimu, naetaa mba'inomo bhahitiemu weo Ompu.

<sup>a</sup> 11 Ma'anano nea Onesimus, nokofahalaa.

<sup>17</sup>Dadi'anomo ane kona kanau pobhai'amu weo kahadhaano Ompu, suli tahimae kanggetumo tahima idi. <sup>18</sup>Ane padamo no-fekahugiko tawa nokodosa ne hintu, fewowo'oni kana'e idi bhahibhahi'ae. <sup>19</sup>Naetaa dua abuhiangkoe amake limaku wutoku: Idi, Paulus, so dumudue. (Tantumo miina namaraluaa ame'ulaiangkoe, ingka hintu itu bhe dosamu dua ne idi. Nepulao'aoku na'a dadi bu'ou netahimamu pakaparasaeamu).

<sup>20</sup>Dadi'anomo bhahitiekue, aefetulumu mpuu ne hintu hampano dopobhahitie weo Ompu; lawesi kanau, ingka intaodi dose'isemo bhe Kristus. <sup>21</sup>Kaebuhi'aku suha aini, hampano aparasaea mpuu mangkafie kamesaloku ini. Bhahamoa apande'aane dua so nehabumu itu nalumiue kamesaloku ini. <sup>22</sup>Tadua sehonda kamesaloku: mefontaa-ntaa kanau so kabutu'aku, kapa'amo aposahuna'ao hampano sambaheamu, dapikifosuli kanau we hintimiu.

### Kasongkono suha

23-25

<sup>23</sup>Epafra nofosampeangko salam. Anoa ini sabhangkaku weo katohongku ini hampano kaparasaea ne Kristus Yesus. <sup>24</sup>Salam nomai'ao dua ne Markus, Aristarkus, Demas bhe Lukas, andoa sanea sabhangka'iku weo kahadhaano Ompu we ini.

<sup>25</sup>Sio-siomo kabarakatino Ompu Yesus Kristus sadhia napobhai'ao totono lalomiu!